

2 Nasundeccu

2 Reyes

Elíasma omboe tsu faesu Chiga aya'fama afa'su, Eliseoja, candusian. Tsa'ma israendeccu toya Chiga aya'fama chi'gasi Na'su Chigaja antte cuintsu Assiria ande'su sundarondeccu jipa tise ma nepiamba anga'faye. Juda'su nasundeccu, majan ño'an, majan ega, ti'tsse can'jemba manda'fa. Tsa'ma tsendeccu'qqe Na'su Chigama ñotsse pañambisi tiseja antte cuintsu Babilonia'su Caldeo aindeccu jipa tise'pama patsu'faye. Tsa'caen patsupa tsu judándeccuma anga tisu Babilonia andeni. Tseni tsu judándeccuja setenta canqqe'fave can'jen'fa.

Elías Chiga sefacconi ja'cho

2 ¹Na'su Chiga Elíasma fingian fentsindaccui'ccu tisu sefacconi angaya'cho a'ta nepisi tsu Elías Eliseoi'ccu fae'ngae Gilgalne sombo'fa.

⁶Omboe Elíasja Eliseoma su:

—Va'tti can'jenjan. Tayo tsu Na'su Chiga ñama manda Jordán naeni jaye.

Tsa'ma Eliseoja su:

—Na'su Chiga caña'jen'ni toya'caen que caña'jen'ni gi ñoa'me quema tisuveyi moeña'bi.

Tsa'caen supa fae'ngae ja'fa. ⁷Ja'fasi cincuenta Chiga aya'fama afasundeccu jipa biane ron'da ccutsu'fa tise'pama isevetsse. Elíasja Eliseoi'ccu Jordán na'en otafani japa ron'da ccutsu'fa. ⁸Tsomba Elíasja tise oppoen'cho sarupama findipa tsai'ccu na'en'su tsa'ccuma ma'ppi. Ma'ppisi tsu na'enjan attufapa san'ame da cuintsu tsa dos a'i san'angae jonifani tsui isefaye. ⁹Tayo isepa tsu Elíasja Eliseoma su:

—Toya ñama que'ye joqqitssiambi'te ñanga condaja jongoesuve ña quenga tsoña'chove.

Tsonsi Eliseoja su:

—In'jan gi que oshaquua'caen dos se ñanga afeye ña quia'caen oshapa ti'tsse oshaya'chove.

Tsonsi Elíasja su:

¹⁰—Re'riccombi tsu que ñañajan'cho. Tsa'ma ñama que'ye joqqitssiansi atte'ta qui que ñañajan'chove an'biaña. Tsambi'ta an'biaña'bi.

¹¹Tsa'caen condase nanimba toya condasé jayi'fa. Tse'faei'ccuyi tise'pa enttinge'ye si'nge caro toya'caen si'nge cavayondeccu attiamba Elíasma sefacconi anga'fa fingian fentsindaccui'ccu.

¹²Tsama attepa Eliseoja quian'me su: “¡Ña yaya, Ña yaya'can qui! ¡Que qui coira'su sundaro caro, coira'su cavayo sundarondequua'can Israelma coira'su!”

Tsama attepa ccase Elíasma attembi.

Eliseo Elías sema'jen'chonga ca'ni

Tsomba tse'i Eliseoja tisu ñombi'ye'choma canjaeñe in'jamba tisu ondiccujema indipa chitta. ¹³Chittapa omboc Eleseoja, Elías tisu oppoen'cho sarupama cati'choma attepa isu. Isupa toequi Jordán naini japa otafani ccutsu. ¹⁴Tseni ccutsupa tsa sarupai'ccu na'ema ma'ppipa su: “Na'su Chiga, ¿Elíasma oshaenquua'caen ti qui ñama'qqe oshaen'jen?”

Tse'faei'ccuyi tsa'ccuja attufapa san'ame da. Tsa'caen dasi Eliseoja tsa'ye toequi ise. ¹⁵Tsonsi Jericó'su Chiga aya'fama afasundeccu tseni isevetsse ccutsusundeccuja tsama attepa su'fa: “Ñoa'me tsu Chigaja Elíasma oshaenquua'caen ja'ñojan Eliseoma tsa'caen oshaen'jen.”

Tsa'caen supa tisenga catsepa andenga puntssan'fa.

Naamán paqqe'suma ccusha'cho

5 ¹Fae a'i tsu can'jen tise inise Naamán. Tiseja Siria ande'su sundaro na'su. Na'su Chiga Siriama fuitepa anttesi Naamán ñotsse geraemba patsusi tsu ande na'su tisema ñotsse in'jan. Tsa'ma Naamánjan na congomba paqqe'sunga dañonge'cho tsu.

²Geraeñe Siria'su sundarondeccuja cca'tti cca'tti jacamba israe'su pushesu du'shuma indipa i afe'fa Naamán pushembe sema'suve. Tiseja Naamán pushema shondopa ³tisema su: “¿Ma'caen'qqe ña na'su Samariani japa tseni'su Chiga aya'fama afa'sunga catse'ta tsu tise na congomba paqqe'suma ccushaya?”

⁴Tsama pañamba Naamánjan ande na'sunga japa pa'cco tsa indi'cho pushesu su'choma conda. ⁵Na'suja pañamba su:

—Ñotssi tsu. Na gi tevaen'jema tevaemba moeña Israel na'sunga.

Tsonsi Naamánjan tevaen'jema isupa Israel andeni ja. Osha'choma tsu anga tise ccushaeña'chove afeye. Nane treinta mil corifin'di, faesu seis mil ñoa'me cori corifin'di, toya'caen diez ñotssia ondiccujé na'su fiestanga ondiccunque'suma'qqe anga afeya'chove. ⁶Nepipa tevaen'jema afe Israel na'sunga qquen su'choma: “Va tevaen'jema isupa cambia qui in'jaña ñama shondo'su Naamánma ña quenga moe'chove tise na congomba paqqe'suma que ccushaeñe.”

⁷Tsa'ma Israel na'su Acabja tsa tevaen'jema cambia tisu ñombi'yepa iyicca'ye'choma canjaeñe in'jamba tisu na'su ondiccujema indipa chi'tta. Chittapa su:

—¿Ñanda ti gi Chiga, a'ima qquendyaëñe toya'caen fi'ttiye oshaye'ta cuintsu Siria'su na'su na congomba paqqe'sui'ccu dañonge'choma ña ccushaëñe moe'ne'da? Aqquia tsu ñai'ccu iyiccoye in'jamba qqen tsincon.

⁸Omboe Chigama afa'su Eliseoja Israel na'su tsa'caen tevaen'jema cambia tisu ondiccu'jema chi'tta'choma pañamba qqen aya'fama moe: “¿Jongoesie qui tisu ondiccu'jema chi'tta? Naamánma ñani moejan cuintsu poi'yi'cco atesu'faye Na'su Chiga aya'fama afa'su toya Israelni can'jen'chove.”

⁹Tsa'caen ttu'sesi Naamánjan pa'cco caro, cavayondeccui'ccu Eliseo tsaoni japa tsotefani ccutsu. ¹⁰Tsa'ma Eliseoja tisu sombombe'yi tisema shondo'suma moe cuintsu qqen condaye: “Japa Jordán na'enga siete se onjomba qui giya'tsse ccushaya que na congomba paqqe'suma.”

¹¹Tsama pañamba Naamánjan ñoa'me iyicca'ye. Iyicca'yepa qqen supa ja: —Ñanda gi in'jan Chiga aya'fama afa'su sombopa ñanga catse ccutsupa Na'su tise Chigama iñajamba tivei'ccu na congomba jin'choma canjaensi ti gi ccushaya. ¹²Nane Damasco canqqe'su Abana na'en toya'caen Farfar na'en tsu poi'yi'cco Israel ande'su na'ema bove ñotssi. ¿Oshambi ti gi tseni japa onjomba ccushaye'ta?

Tsa'caen supa ñoa'me iyicca'yepa tse'ttie ja. ¹³Tsa'ma tisema shondosundeccuja tisenga catsepa su'fa:

—Na'su, ¿tsa Chiga aya'fama afa'su ñoa'me aiye'pave manda'choecan'da ti qui tsa'caen tsombiye'can? Tsa'ma tiseja aye'pambi'ccoe mandapa 'Onjomba qui ccushaya' qqen su'chomanda tsu tsa'caen tsoncaña'cho.

¹⁴Pañamba Naamán japa Jordán na'enga siete se cu'no Chiga aya'fama afa'su suquía'caen. Tsa'caen siete se onjomba sombosi tayo ccushapa tise najan ñoa'me cunamba dusunga ttonoa'cantsse da. ¹⁵Ccushapa toequi tisema shondosundeccui'ccu Eliseoma can'su ja'fa. Tiseni ji ccutsupa tsu Naamánjan su:

—Ja'ño gi in'jan poi andeni faesu chiga jimbisi fae Na'su Israel Chiga tsu ñoa'me Chiga.

Omboe tsu tsain'bio nasundeccu Israel aindeccuma manda'je'fa. Poi'yi'cco egae tsincomba Na'su Chigama ñotsse paña'fambi. Judá andeni'qqe tsain'bio nasundeccu, David omba'su dutssiyendeccu, manda'jesi fae pushesu'qqe manda. Majan tsendeccu'su Na'suma pañamba ñotsse tson'fa. Tsa'ma faesundeccu egae tsincomba Na'su Chigama ñotsse paña'fambi.

Asiria israendeccuma anga'cho

17 ¹Acáz dose canqqe'fave Judáma manda'je'ni tsu Ela dutssi'ye Oseasja Israel na'suve dapa mandaye ashaen. Samariani can'jemba nueve canqqe'fave tsu israendeccuma manda. ²Oseasja tayo'su Israel nasundeccu egae tsinconquia'caeni egae tsincombi'ma Na'su Chigaja tise tson'choma attepa toya ega qqen tsu in'jan.

³Omboe Salmanaser, Asiria'su na'su, Israeli'ccu geraemba Oseasma patsu. Tsa'caen Israel Asiriama fuitesi Oseas gobiern'o'qqe poi canqqe'fa

Salmanasernga afepoen'jen. ⁴Tsa'ma Oseasja Asiriana catiye in'jamba canqque'fanga tise afepoen'jen'choma moembi. Tsa'caen moembi'pa a'tutsseyi tisema afasundeccumae moe Egipto'su na'su Songa cuintu tisema fuiteya'chove afa'faye. Tsama pañamba Salmanaserja tise sundarondeccumae moe cuintu Oseasma indipa picco'faye. Picco'je'cho ettinga piccopa ⁵poi sundarondeccu'ccu Samariani japa tres canqque'fa gerave tson. ⁶Osefa'poe Oseas nueve canqque'fa Israel na'suve dapa can'jensi Asiria'su na'su Samariama patsu. Patsupa poi a'ima indipa Asiriani anga. Majama Halahni angapa cutsian cuintu tseni can'jeñe. Majama Gozán naini angapa Haborni cutsian cuintu tseni can'jeñe. Toya'caen majama cca'tti'su medondeccu canqueni anga.

⁷Nane israendeccuja Na'su tise'pa Chigama egae tsincomba faesu chigandeccumae inñajan'fa. Tsa'cansi tsu Chigaja ante cuintu ccase vana'faye. Nane Egipto'su na'su faraón tise'pama vanae'jensi Chigaja tise'pama itsapa Egipto'ye somboen. ⁸Somboemba faesu aindecumae tteyamaña cuintu israendeccu tise'pa andeni can'jeñe. Tsa'ma tsa faesu aindecu mandaquua'caeni tsu Israel nasundeccu'qqe egae tsincomba manda'fa. Tsa'cansi tsu Na'suja ccase tise'pama vanae.

⁹Toya'caen tsu israendeccuja Na'su Chiga in'jambi'choa've a'tutsse egae tsincon'fa. Nane poi canqueni, majan aquia se'fatsse caña'jen'cho tsa'o jini canquian'jen'tti toya'caen sundaro can'jen'cho ta'etssia canqueni'qqe tsu faesu chigama inñajan'jen'ttive ñoña'fa. ¹⁰Toya'caen tsu poi se'fatssia ccotta'cconga, poi quini'jin tsosiccu'su tumbianccunga inñajaña'cho patuma ccutsian'fa. Aserama ñoña'cho chigama'qqe tsu tseni ccutsian'fa. ¹¹Nane Na'su Chiga joquitssian'cho a'i inñajanquia'caeni tsu israendeccu'qqe poi se'fatssia inñajan'jen'ttinga ñome'bama oque oraen'fa. Tsa'caen egae tsincon'fasi tsu Na'su Chigaja tise'pama iyicca'ye. ¹²Na'su Chiga “¡Que'ija tsa'caen tson'fajama!” qquen su'ni'qqe toya tsu ñoña'cho chigandeccumae inñajan'jen'fa.

¹³Tsa'caen tson'jen'fasi Na'su Chiga poi'ico tise aya'fama afasundeccu toya'caen tise canjaen'choma attesundeccumae in'jaensi tsu israendeccu toya'caen judandeccumae manda'fa cuintu tise'pa egae canse'choma cati'faye. Nane Chigaja Israel tayopi'su antiandeccumae tise manda'cho toya'caen tise atesian'choma'qqe tayo conda tisema shondo'su Chiga aya'fama afasundeccu'ccu. ¹⁴Tsa'ma aindecu paña'fambi. Nane tise'pa tayopisundecquua'caeni tsosinambipa Na'su tise'pa Chigave in'jan'fambi. ¹⁵Na'su Chiga tise'pa tayopi'su ccasheyendeccu'ccu fae'ngae injancco'fa'choma catipa tise manda'choma'qqe chi'ga'fa. Tsa'caen “¡Tson'fajama!” qquen Chiga su'ni'qqe pañambiquia'caen tsincon'fa. Nane “¡Faesu pporotsse can'jen'cho aindecquua'caen tson'fajama!” qquen Chiga se'pi'ni'qqe tsendeccumae ma'depa barembi'choa ñoña'cho chigandeccumae inñajan'fa. Tsa'caen inñajamba tsu tise'pa'qqe barembi'choa've da'fa.

¹⁶Osha'chove Na'su tise'pa Chiga manda'choma catipa cu'a yoshavama tsusstsiamba dos ñoña'cho vaura du'shuve ñoña'fa tsama inñajañe tise'pa chigave. Toya'caen tsu Asera quini'ccoma ccutsian'fa tsama'qqe inñajañe. Osha'cho

sefacconi jincho'choma chiga qquen in'jamba Baalma'qqe iñajan'fa. ¹⁷Tise'pa dushundeccoma'qqe chigandeccuonga afeye oque fi'tti'fa. Davuma atesu'fa. Toya'caen tise'pa coragandeccuja seje'ccoi'ccu fi'tti'fa. Nane ma'caen osha'ta Na'su Chiga in'jambi'chove tsomba tsai'ccu Na'suma iyicca'yeanē in'jamba tta'tta'fa.

¹⁸Osefa'poe Na'su Chigaja ñoa'me iyicca'yepa Israelma tisu'ye joqqitssian. Judáyi tsu ccusha. ¹⁹Tsa'ma Judá'qqe Na'su tise'pa Chiga manda'choma pañambi. Nane Israel tsoñe atesuqquia'caen tsu Judá'qqe tson. ²⁰Tsa'caen tson'fasi tsu Na'su Chigaja poi israendeccoma cati. Catipa tise'pama vanaemba afe patusundeccuonga. Nane tsa'caen tsu tisu'ye joqqitssian. ²¹O'tie David manda'je'cho'suma tsu Israel aindeccoma enttingeve itsa. Tsa'caen itsasi tsu israendeccuja Nabat dutssi'ye Jeroboamma na'suve ca'nia'fa. Tsa Jeroboam tsu israendeccoma angacan cuintsu Na'su Chigama catipa ñoa'me egae tsinon'faye. ²²Nane israendeccuja Jeroboam tson'choma chi'gambi'pa tsa'caen canse'fa. ²³Osefa'poe Na'suja tayo tise'ma shondo'su Chiga aya'fama afasundeccoma afaemba tsa'caen israendeccuonga condapa tisu'ye tsendeccoma joqqitssian. Tsa'cansi tsu israendeccuja tise'pa ande'ye joqqitssipa Asiria andeni angayepa tseni canse'fa. Toya tsu ja'ñopan tseni canse'fa.

CCA'INDECUMA SAMARIANI CA'NIAN

²⁴Israendeccoma Asiriani angapa Asiria'su na'suja faesu aindeccoma ipa ca'nia Samaria'su canquenga. Nane babiloniandeccu, cutandeccu, avandeccu, hamateondeccu toya'caen sefarvaindeccoma'qqe ipa ca'nia cuintsu Samaria andema an'biamba tseni canse'faye. ²⁵Tsa'ma tsesu aindecchu Na'su Chigama atesu'fambisi Na'suja ttesindeccoma moe. Moesi jipa majan aindeccoma fi'tti'fa. ²⁶Tsa'caen fi'tti'jesi tsu Asiria'su na'sunga conda: “Que Samariani angapa ca'nia'chondeccuja atesu'fambi tsa ande'su chigama ma'caen iñajañe. Tsa'cansi tise ttesindeccoma moesi tsu majan aindeccoma fi'tti'je.”

²⁷Tsama pañamba Asiria'su na'suja manda: “Fae'cco indiy'e'cho israe'su Chigama afa'suma moejan Samariani cuintsu tseni can'jemba aindeccoma tsa ande'su chigane atesiañe.”

²⁸Tsonsi fae'cco Samaria'ye joqqitssi'cho Chigama afa'suma moesi japa Betelni can'jen. Tseni can'jemba aindeccoma atesian ma'caen Na'su Chigama iñajaña'chove. ²⁹Tsa'ma poi cca'tti'su aindecchu tseni can'jemba tsu tise'pa canqueni'su iñajan'jen'ttinga tise'pa ande'su chigandeccoma ccutsian'fa. Nane Samaria aindecchu ñoña'cho selfatssia iñajan'je'ttinga tsa'caen ccutsian'fa.

³³Tsa'camba aindeccuja Na'su Chigama iñajan'an'qqe toya tsu tise'pa chigandeccoma'qqe iñajan'fa. Nane tayopi tseni can'jen'cho aindecchu in'jañe atesuqquia'caen tsu toya tson'jen'fa.

EZEQUÍASJA JUDÁ NA'SU

18 ¹Oseas tsa Ela dutssi'ye tres canqu'e'fave Israelma manda'je'ni Ezequías, tsa Acáz dutssi'ye, Judáma mandaye ashaen. ²Nane

veinticinco canqqe'fave an'biamba tsu mandaye ashaen. Tsa'caen ashaemba tsu Judáma veinte y nueve canqqe'fave manda Jerusaléni can'jemba. Tise mama tsu Abi tsa Zacarías onque'nge. ³Ezequíasja tise tayopi'su antian David'caen osha'choma ñotsse tsonsi Na'su Chigaja tisei'ccu avujatssi.

Asiria'su Senaquerib Judáni ji'cho

¹³Ezequías catorce canqqe'fave Judáma mandaje'ni tsu Asiria na'su Senaquerib geraeñe ji. Jipa poi Judá'su sundaro coira'je'cho canqqema iyiccopa patsu.

¹⁷Omboe tsu Asiria na'suja tise ti'tsse'tssia sundaro na'suma moe na'su Ezequíasnga. Tisei'ccu tsu faesu in'jan'cho shondo'su, toya'caen faesu joccapitssia na'su ji'fa. Tsendeccuja tsain'bio sundarondeccui'ccu Laquisne sombopa ji'fa Jerusalénma patsuye.

²⁸Jerusaléni jipa tsu joccapitssia na'suja ccutsupa canqqe ttuccuni dyaisundeccunga quian'me fundopa hebreo aya'fangae qqen su:

—Asiria ande'su ti'tsse joccapitssia na'su que'inga su'choma paña'faja: ²⁹'Injama'tse Ezequías que'ima afopensa'ne. Nane ñoa'me oshambi tsu tiseja que'ima ccushaeñe. Ñoa'me gi que'ima patsuya.' ³⁰Nane Ezequías: 'Na'su Chigaja antteya'bi tsu cuintsu Asiria va canqqema patsuye' qqen su'ni'lqqe ³¹¡tisema paña'fajama!

Na'su Chiga Judáma ccushaen'cho

19 ¹Judá'su na'su Ezequíasja tsama pañamba iyicca'yepa tisu ondiccujema chi'tta. Chi'ttapa faesu tsincco'cco'je'cco'a sarupama ñoña'cho ondiccujema ondiccu tisu ñombi'ye'choma canjaeñe. Tsa'caen ondiccupa Na'su Chiga ettini ja. ²Tseni japa ttu'se cuintsu tise'be na'su tsa'oma coira'su na'su, Eliaquim, toya'caen tayopi'su tson'choma tevaen'su, Sebna, tiseni ji'faye. Poi Chigama afasundeccu, coenzandeccuma'qqe ttu'se. Tsendeccuma tsu ttu'se cuintsu tsincco'cco'je'cco'a sarupama ñoña'cho ondiccujema ondiccupa Chiga aya'fama afa'su, tsa Amoz dutssi'ye, Isaíasi'ccu bopa condasecco'faye. ³Condaseccopa tsu na'su in'janquía'caen qqen su'faya'cho: "Ja'ño gi ñoa'me vana'jen'fa. Cca'li ingima noñangiansi gi ansangepa can'jen'fa. Nane pushesu pan du'shuve isuye tson'jemba quin'su me'choe dapa oshambiqquia'caen gi osha'fambi. ⁴Isha tsu Na'su que Chiga'lqqe va Asiria na'suma shondo'su aya'fama pañaña. Nane tise na'su tsu tisema moe cuintsu Ñoa'me Cansian Chigama afaseye. Isha tsu Na'su que Chigaja tsama pañamba tsendeccumbe injama'choma somboeña. Chigáne ingi toya can'jensundeccune Chigama iñajanjan."

⁵Na'su Ezequías tsa'caen mandasi tisema shondosundeccu na'su su'choma Isaíasnga condasesi ⁶Isaíasja qqen suye manda: "Qquen tsu Na'su Chigaja su: 'Asiria'su na'sumbe shondo'su ñama afase'choma dyo'fajama. ⁷¡Que canjan! Tsoña gi cuintsu Asiria na'su injanga condase'choma pañamba toequi tise andeni jaye. Nane tise tseni jasi gi tsoña cuintsu tsenisundeccu tisema fi'ttiye.'" "

²⁰Tsomba Isaíasja manda cuintu Ezequíasnga qquen su'faye:
 “Qquen tsu Na'su israe'su Chigaja su: ‘Tayo gi paña que'i Asiria na'su
 Senaqueribma dyopa ñama iñajan'jen'choma.’”

³²Asiria na'sune tsu Na'su Chigaja qquen su:

“Jerusaléni ca'niña'bi tsu

ni fae battittian'ccoyi'qqe tsu battiaña'bi.

Nane tise sundarondeccuja panshaen'jen'choi'ccu catsepa

andema boña'faya'bi canqqe ttuccuma panshaña.

³³Va canquenga ca'nimbe'yi tsu

utu tsaiquie'yi toequi jaya.

Ña Na'su gi ñoa'me su:

³⁴Va canquema gi coirapa ccushaëña.

Nane Tisuja ñotssipa Tisuma shondo'su Davidma

ñotsse in'jamba gi tsa'caen ccushaëña.”

³⁵Tsequi cose tsu Na'su Chigambe sefacconi'su shondo'su japa ciento ochenta y cinco mil Asiria'su sundarondeccuma fitti'tti. Ccaqui a'tasi poiyl'cco tsu papa ccui'fa. ³⁶Tsa'caen pa'fasi Asiria na'su, Senaquerib, jangipa poiyl'cco toya canse'cho sundarondeccui'ccu toequi Níniveni ja'fa.

20

²¹Ezequías pasi tise dutssi'ye Manasésja na'suve dapa manda'je.

Manasés Judáma manda'cho

21

¹Manasésja doce canqqe'fave an'biamba na'suve da. Tise mama inise tsu Hepsiba. Tsa'caen na'suve dapa cincuenta y cinco canqqe'fa Jerusaléni can'jemba manda'je. ²Tsa'ma ñotsse manda'jembisi Na'su Chigaja tise egae tson'jen'choma atte. Nane tise tayopi israendecunga afeye ande'ye joquitssian'cho aindeccu egae tsonquua'caen tsu Manasés'qqe tson.

¹⁸Manasés pasi na'su tsaofa'su jomba'cho tetacunga tisema a'tu'fa. Tsa tetaccu tsu tayopi'su na'su Uza'ye jombachoccu. Tsonsi tsu Manasés dutssi'ye Amón na'suve dapa manda'je.

Amón Judáma manda'cho

¹⁹Amónjan veinte y cuatro canqqe'fave an'biamba na'suve dapa mandaye ashaen. Jerusaléni can'jemba dos canqqe'fave manda'je. Tise mama inise tsu Mesulemet. Tsambe yaya tsu Hazur, Jotba dutssi'ye. ²⁰Tsa'ma Amón'qqe tise yaya Manasésa'caen egae tson'jensi Na'su Chigaja tsama atte. ²³Tsonsi tisema shondosundeccu fae'ngae ñoñamba tisema fi'tti'fa tise na'su ettinga. ²⁶Fi'ttisi cca'indeccu tisema a'tu'fa na'su atu'tti changonga tsa Uza'ye jombachoccuni. Tsonsi tsu tise dutssi'ye, Josías, na'suve dapa manda'je.

Josías Judáma manda'je'cho

22

¹Josíasja ocho canqqe'fave an'biamba na'suve dapa mandaye ashaen. Jerusaléni can'jemba treinta y un canqqe'fave manda'je.

Tise mama inise tsu Jedida. Tsambe yaya tsu Adaía, Boscat canquque'su a'i. ²Josíasja tise tayopi'su antian David'ye mandaquua'caen egae tsincombe'yi ñotsse manda'jesi Na'su Chiga tise ñotsse tson'choma atte.

Chiga Tevaen'jema atte'cho

³Na'su Josías diez y ocho canquque'fave manda'je'ni tise ma tevaen'su, Safánma, Chiga ettinga jaye manda. Safán yayaja Azalía, tise yayaccasheyeja Mesulam. Mandapa qquen su:

⁴—Chigama afa'su na'su Hilcíasnga japa condaja cuintsu Chiga Ettinga ipa afe'cho corifin'dima ñoñañe, tsa sombo'ttima coirasundeccu aindeccu'ye isu'cho corifin'dima. ⁵Ñoñamba tsa corifin'dima Na'su Chiga ettima coirasundeccunga afeya'cho cuintsu tsendeccuja ñoñamba semasundeccunga afeye etti daño'chove ñoñañe.

⁸Tsa'caen ñoña'jen'fasi Chigama afa'su na'su Hilcíasja na'suma tevaen'su Safánma conda:

—¡Na'su Chiga ettima ñoñamba gi Chiga Aya'fa Tevaen'jema atte!

Tsa'caen condapa Chiga Aya'fama afesi Safánjan tsama cambia afa.

¹⁰Tsomba Safánjan na'su Josíasma Hilcías atte'cho tevaen'jene condapa tsa Chiga Tevaen'jen su'choma na'sunga cambia afa. ¹¹Chiga Tevaen'jen manda'choma pañamba na'suja tise ondiccu'jema chitta, ñombi'ye'choma canjaeñe. ¹²Chigama afa'su na'su, Hilcías, Safán dutssi'ye, Ahicam, Micaías dutssi'ye, Acbor, na'suma tevaen'su, Safán, toya'caen na'suma shondo'su, Asaías, tseni can'jensi na'su Josíasja tise'pama manda:

¹³—Japa ñane Na'su Chigama iñajamba poi Judá'su aindeccune'qqe iñajan'faja. Nane va atte'cho tevaen'jema cambia gi in'jan Na'su Chiga ingima ñoa'me iyicca'ye'choma. Ingima tayopisundeccu va manda'choma pañambi'fa. Pañambipa va manda'cho tevaen'jema mandaquua'caen tson'fambi.

¹⁴Tsonsi Hilcías, Ahicam, Acbor, Safán, Asaías'qqe Jerusaléni'su segundo tsa'o bo'fa'choni japa Chigama afa'su pushesu Hulda tsa'onga ja'fa. Hulda tsa'ndu tsu Salum, tsa Ticva dutssi'ye. Ticva yaya tsu Chiga etti'su sarupama coira'su, Harhas. Tseni japa Huldama condasesi ¹⁵tsu su:

—Qquen tsu Na'su, Israel Chigaja que'i iñajan'choma pañamba su: 'Que'ima iñajañe manda'sunga japa ¹⁶ña Na'su gi qquen su'choma conda: Va aindeccuma, va canquema'qqe gi ñoa'me vanaeña. Nane osha'cho tsa tevaen'jenga Judá na'su cambia afaquua'caen gi vandecunga tsoña. ¹⁷Ñama catipa faesu chigandeccunga ñome'bama oque oraemba ñama iyicca'ye. Tsa'caen tive'ccu ñoña'cho chigandeccuve ñoñasi gi si'nge anchandasi fi'ttiye oshambiquua'caen anttembe'yi tise'panga iyicca'yeya. ¹⁸Tsa'cansi Na'suma iñajañe que'ima manda'su Judá na'sunga condaja tise cambia afa'cho tevaen'jene Na'su, Israel Chiga qquen su'choma: Queja que atte'cho tevaen'jema cambia ñotsse pañamba ¹⁹injama'choni tsama in'jamba ñombi'ye'sui'ccu ñama iñajansi gi quema paña. Nane ña va aindeccu, va canquema'qqe chi'gapa ñoa'me vanaemba sefaeña qquen

su'choma pañamba ñombi'yepa tsa'caen canjaeñe que ondiccu'ljema chittapa ina'ljensi gi quema paña. Tsa'cansi ña Na'su gi quema paña. ²⁰Quema pañamba gi ante cuintu toya va canquenga tsa'caen tsombisi queja opatsse can'ljema que tayopisundequua'caen paye. Nane queja va ega daño'choma cañambi.'

Tsama pañamba mandasi iñajansundeccuja toequi na'sunga ja'fa Na'su Chiga su'choma condaye.

Josías Chiga ettima giyaen'cho

23 ¹Condasi na'suja poi Judá'su toya'caen poi Jerusaléni'su coenzandecuma ttu'sepa boña. ²Tsonsi poiya'cco a'i utu'ccoapa joccapitssia'qqe bo'fa. Poi Judá'su tsandiendeccu, poi Jerusaléni canjensundeccu, Chigama afasundeccu, Chiga Aya'fama afasundeccu, nane poiya'cco a'i Na'su Chiga ettinga na'sui'ccu bo'fa. Tsa'caen bopa paña'fasi na'su Josíasja pa'cco tsa Na'su Chiga ettini atte'cho Chiga a'i'ccu injancco'fa'cho tevaen'ljema cambia quian'me afa. ³Omboe na'suja Chiga etti'su chan'jime dyaiña'cho jini jangi ccutsupa Na'su Chigai'ccu injancco'fa'chove afa. Nane Na'su Chigama pañamba anttembe'yi tsa'caen cansepa pa'cco tise injama'choi'ccu, pa'cco in'jan'choi'ccu tsa'caen tsoñe afa. Pa'cco Chiga Tevaen'jen mandaquua'caen tsoñe qqen susi poi aindecu'qqe tsa'caeni injancco'fa'chove afa'fa.

Tsonsi na'su Josías mandasi Chigama afasundeccuja osha'cho faesu Baal toya'caen Asera chigandeccu jincho'cho, poi ñoña'cho chigandeccum'qqe Chiga etti'ye joquitssipa ju'ru sefaen. Poiya'cco tsesu chigandeccum'qqe afasundeccum'qqe fitti'tti. Osha'cho cca'tti cca'tti ccutsu'cho poi canquenga faesu chigandeccum'qqe iñajan'jen'ttima'qqe osuipa sefaen. Toya'caen tayopi'su Israel na'su Jeroboam ñoña'cho Chiganga oque oraen'jen'choma asi'ttapa dañomba sefaen. Tsa'caen andema giyaene nanisi toequi Jerusaléni japa can'jen.

Josías Na'su Chigama in'jan'cho

²⁴Toya'caen poiya'cco coragandeccu, poi aiya'ccu condasesundeccum'qqe joquitssipa, poi aindecu tsaoni jincho chipiri chigandeccum'qqe somboemba sefaen. Nane osha'cho Judá toya'caen Jerusaléni'su egae jincho'choma'qqe tsangae nepian. Tsa'caen tsu tson Chigama afa'su Hilcías Na'su Chiga ettinga atte'cho tevaen'jen manda'chove nanitsse tsoñe. ²⁵Me'l'on tsu faesu na'su Josías'can Na'su Chigave in'jamba paña'su. Nane tisema o'tie ni tisema omboe tsu majan na'su tisia'cambi. Pa'cco injama'choi'ccu, pa'cco in'jan'choi'ccu, ma'caen osha'ta tsu Moisés tevaen'cho manda'choma pañamba canse.

Josías pa'cho

²⁹Omboe Egipto ande na'su faraón, tsa Necoja, Asiria'su na'suma fuituye in'jamba Eufrates naeni jaye ja tise sundarondecui'ccu. Tsa'caen japa Judá

ande'ye pashansi Josíasja tise sundarondeccui'ccu sombo tisema se'piye. Megidoni japa cachuiccopa iyiccopa Necaaja Josíasma fi'tti. ³⁰Fi'ttisi Josíasma shondo'su sundarondeccu tise ai'voma Jerusaléni angapa a'tu'fa tise atu'ttinga. Tsonsi Judá aindeccuja Josías'ye dutssi'ye Joacazma ca'nia'fa cuintsu na'suve dapa tise yaya'ye mandaquua'caen manda'jeye.

Joacaz Judáma manda'cho

³²Tsa'ma Joacazja majan tise tayopi'su antiandequua'caen egae tsinconsi Na'su Chigaja tsama atte. ³⁴Tsonsi faraón, tsa Necaaja, Joacazma joquitssiamba faesu Josías'ye dutssi'ye, Eliaquimma ccutsian cuintsu na'suve dapa tise yaya'ye mandaquua'caen manda'jeye. Toya'caen tise inisema cambiamba inisian Joacim. Joacazmajan indipa anga Egiptoni. Tseni tsu tsaja pa.

Joacim Judáma manda'cho

³⁶Joacimjan veinte y cinco canque'fave an'biamba Judá na'suve dapa Jerusaléni once canque'fave manda'je. Tise mama inise tsu Zebuda. Tsambe yaya tsu Pedafías, Ruma canque'su a'i. ³⁷Tsa'ma Joacim tise tayopi'su ccasheyendeccu'ye egae tsinconquua'caen tsincomba ñotsse mandambisi Na'su Chigaja tsama atepa tisema chi'ga.

24 ¹Tsa'caen Joacim manda'je'ni Babilonia'su na'su Nabucodonosor Judá andeni jipa tisema patsu. Tsa'caen patsuyepa tsu Joacimjan tres canque'fave Nabucodonosor mandaquua'caeni manda'je. Tsa'caen manda'je'cho ccaningae in'jamba tise'ye somboye in'jamba ñotsse pañañe chi'ga. ²Tsa'ma Joacim tsa'caen Nabucodonosorma pañañe chi'gasi Na'su Chiga antte cuintsu ccanambandeccu, nane caldeondeccu, siriondeccu, moabitandeccu, amonitandeccu'qque, jipa tise andema noñangiamba dañofaye. Nane tayopi Na'su Chigaja tise aya'fama afasundeccumma in'jaensi Judádeccunga condase'fa tsa'caen tise'pama sefaña'chove. ³Nane Judá na'su Manasés'ye osha'cho egave tson'chone Na'su Chigaja iyicca'yepa tisu'ye Judáma joquitssiañe in'jamba tsa'caen tson. ⁴Toya'caen Manasés'yeja Jerusaléni tsain'bitssi egae tsincombindequuiama injanga fitti'tti'chone tsu Chigaja iyicca'yepa tsa'caen tson. Ñoa'me tsu Na'su Chigaja Judá egae tsincon'choma ti'tsse aqqe'paye in'jambi.

⁵Pa'cco Joacim ti'tsse tson'cho tsu Judá nasundeccu tson'cho tevaen'jenga tevaen'cho. ⁶Tise pasi tsu tise dutssi'ye Joaquín na'suve dapa manda'je.

⁷Tsequi Egipto'su na'su ccase Judáni jimbi. Nane Babilonia'su na'sunga pa'cco Egiptondeccu biani an'bian'cho andema, tsa Egipto sinjuncune Eufrates na'emp'i'e, itsapa tsu tisu andeniñi can'jen.

Joaquín Babiloniani anga'cho

⁸Joaquínjan diez y ocho canque'fave an'biamba mandaye ashaemba Jerusaléni tres ccovuveyi manda'je. Tise mamajan Jerusaléni'su Elnatán onque'nge Nehusta. ⁹Tsa'ma Joaquín tise yaya'ye'caen egae tsinconsi Na'su Chigaja tsama atepa chi'ga.

¹⁰Tsa'caen Joaquín manda'je'ni tsu Babilonia'su na'su Nabucodonosor sundarondeccuja Jerusaléni jipa shoquendi ttu'fa geraeñe. ¹¹Geraeñe ashaen'fasi Nabucodonosor'qque ji. ¹²Tise jipa patsusi tsu Judá na'su Joaquínjan tisuma Babilonia'su na'sunga afepa, tise mama, tise ma shondosundeccu, nasundeccu, tise mandasi paña'jen'chondeccuma'qque afe cuintsu indi'faye. Nane Nabucodonosor canqque'fa ochove manda'je'ni tsa'caen Judáma patsu.

¹³Tsa'caen Judá nasundecuma indipa Nabucodonosorja Na'su Chiga suqquia'caen osha'cho na'su ettini jincho'choma toya'caen Na'su Chiga ettini bare'cho jincho'choma'qque itsapa anga. Toya'caen pa'cco Salomón tayopi Na'su Chiga ettinga corima ñoña'choma'qque ucca'shopa anga. ¹⁴Poiyi'cco Jerusaléni'su aindecuma indipa poi nasundeccu, poi bove ñotssia sundarondeccu, poi ñoñasundeccu, yoshavama semasundecuma'qque indipa anga. Nane poiyl'ccoma indipa agattosi tsu diez mil a'i. Tsa'caen angasi metssi tsu Judá andeni can'jen'chove. Tsa'ma tsa'su majan porindeccu tsu toya canjen'fa.

¹⁵Aindecuma angapa Nabucodonosorja Judá na'su Joaquín, tise mama, tise pushendeccu, tise ma shondosundeccu, Judá'su ti'tsse joccapitssia aindecuma'qque Jerusaléne somboemba Babiloniani anga. ¹⁶Bove ñotssia sundarondeccu indiyepa ja'chondeccu tsu siete mil a'i. Poiyi'cco tsendeccu tsu quian'me geraeñe atesu'fa'chondeccu. Ñoñasundeccu toya'caen yoshavama semasundeccu indiyepa ja'chondeccu tsu mil a'i. ¹⁷Babilonia'su na'suja tsa'caen Joaquínma joqquitssiamba tise ton'ton Mataníasma Judá na'suve ccutsian. Tsa'caen tsomba tise inisema cambian Sedequíasve.

Sedequías manda'je'cho

¹⁸Sedequíasja veinte y un canqque'fave an'biamba Jerusaléni mandaye ashaemba once canqque'fave manda'je. Tise mama tsu Libna'su Jeremías onque'nge, Hamutal. ¹⁹Tsa'ma tise'qque Joacim'caen egae tsinconsi Na'su Chigaja tsama attepa chi'ga. ²⁰Chi'gapa Na'suja Jerusalén, toya'caen Judáma iyicca'yepa tisu'ye tise'pama joqquitssian.

Jerusalén patsuye'cho

25 Omboe na'su Sedequíasja Babilonia na'su manda'je'choma chi'gapa pañañe in'jambi. ¹In'jambisi na'su Nabucodonosorja poiyl'cco tise sundarondeccui'ccu Jerusaléni geraeñe jipa ttu'fa. Nane Sedequías, canqque'fa nueve, decimo ccovu, toya'caen a'ta diez tise manda'je'cho, tsu tsa'caen jipa Jerusalén isevetsse tise'pa carpama ccutsian'fa. Ccutsiamba andema'qque canqque ttucunga cca'tti, cca'tti boña'fa tsa'ye ansundepa osha'ta canquenga ca'niñe. ²Tsa'caen canquema ttupa ronda'je'fa. Sedequías manda'je'cho canqque'fa once, ³ccovu cuatro, a'ta nueveve nepisi anqque'su sefasi poiyl'cco a'i ñoa'me qquipoe'su'fa. ⁴Tsequi a'ta canqque ttucuma canshaemba na'su Sedequíasja poiyl'cco tise sundarondeccui'ccu cose canqque'ye sombopa ccuyin ja'fa. Nane Babilonia'su caldeo sundarondeccu toya canquema ttupa ronda'je'fa'ni'qque tsu

canqqe'su dos ttuccu enttinge'su sombo'tti'ye sombopa na'sumbe tetaccungae japa Jordán na'en sinjunccuni ccuyin ja'fa. ⁵Tsa'ma caldeo'su sundarondeccu na'su Sedequíasma mandiamba japa Jericó sinjunccuni tisema indi'fa. Indi'fasi Sedequíasma sundarondeccuja tisema catipa attufaen japa ccuya'fa. ⁶Tsa'caen indipa caldeo sundarondeccuja Sedequíasma Babilonia'su na'sunga anga'fa Hamat ande'su Ribla canqqeni. Tse'ttinga na'su Nabucodonosorja Sedequíasma ma'caen tsoña'chove manda. ⁷Tse'ttingayi Sedequíasma caña'jen'ni tise dutssiyendeccoma fi'tti'fa. Fi'ttipa Sedequíasmajan tso'fema tssa'jamba candenai'ccu tandamba Babiloniani anga'fa.

Chiga etti asittaye'cho

⁸Nabucodonosorja, canqqe'fa diez y nueve, ccovu cinco, toya'caen a'ta sieteve tise Babiloniamanda manda'je'cho, tisema coira'su sundaro na'su Nabuzaradánma Jerusaléni manda moe. Mandasi jipa ⁹Chiga ettima oque cati. Toya'caen tsu na'su etti, poi tsa'o, majan rande, majan chipirima'qqe oque cati. ¹⁰Pa'ccoma oque catisi tisei'ccu jacan'su caldeo'su sundarondeccuja Jerusalén'su patu ttuccuma'qqe asitta'fa. ¹¹Tsa'caen pa'ccoma asi'ttapa Nabuzaradánjan manda cuintu poi'cco toya canqqeni can'jensundeccoma Babiloniani anga'faye. Toya'caen majan judándeccu, tisupa a'ima chi'gapa Babilonia na'sunga tsuma afe'chondeccu, toya can'jen'cho osha'chove ñoñasundeccoma'qqe manda cuintu indipa Babiloniani anga'faye. ¹²Nane jo'su majan ti'tsse osha'chove mendeqqiaveyi toeni cati cuintu can'jembra tsajaccu, potreroma'qqe coira'je'faye.

¹³Toya'caen caldeondeccuja Chiga ettini jincho cu'a yoshavama ñoña'choma do'jo'fa fava'coe dasi Babiloniani angaye. Nane tsa'caen Chiga ettima asi'ttapa cu'a yoshavama ñoñamba dyaiña'choma, tsa'ccu tanque randema, tsambe tsosicunga ccutsutsian'choma'qqe do'jopa Babiloniani anga'fa.